

四明叢書

張宗祥



西漢朱買臣字翁子吳人家貧採樵賣給養嘗負薪讀書行且歌妻羞爲之求去買臣益歌自若後嚴助薦買臣於上召見說春秋楚辭武帝甚悅之拜買臣爲中大夫與嚴助俱侍中後拜買臣爲會稽太守見本傳○晉王猛字景略北海人少貧賤以鬻畚爲業嘗貨畚於洛陽乃有一人貴買其畚而云無直自言家去此不遠汝隨我取直猛利其貴而從之行不覺遠忽至深山見一父老鬚髮皓然據胡牀而坐乃十倍償直遣人送之旣出顧視乃嵩高山也猛瓌姿雋

偉不屑細務人皆輕之猛悠然自得隱居華陰聞桓
溫入關披褐詣之捫虱而談當世之務旁若無人溫
異之與語甚悅暑祭酒辭不就升平元年秦尚書呂
婆樓薦與秦主苻堅一見如故友語及時事堅大悅自
謂玄德之遇孔明遂爲中書侍郎復爲尚書左丞見
本傳

苟充詘而隕穫數子奚望於公侯噫可不忍歟

記儒行篇儒有不隕穫於貧賤不充詘於富貴註云
隕穫困迫失志之貌充詘驕喜失節之貌數子者指

上步騰等時未遇時則怡然自處何嘗有厭貧賤慕富貴之心乃與時偕行肯詘道哉

貴之忍第十三

貴爲王爵權出於天洪範五福貴獨不言

人有爵祿謂之貴爵有五等孟子曰天子一位公一位侯一位伯一位子男同一位凡五等稱天子者代天理物故云稱王者天下歸向之謂徽號雖殊名義則一於五爵之中唯王爵最貴權稱錘也較萬物輕重之利器也又曰爵則天爵故有天爵者則當權衡

天下萬物之不齊故曰權出於天豈不貴哉故荀子
正論篇云聖人備道全美者是縣天下之權稱也○
書洪範九疇次九曰嚮用五福曰壽曰富曰康寧曰
攸好德曰考終命而已惟不書貴者謂人貴位難常
故不書備見下文

朝爲公卿暮爲匹夫橫金曳紫志滿氣驕下獄投荒布
褐不如

揚子解嘲文曰旦握權而爲公卿夕失勢則爲匹夫
公三公也卿九卿也匹夫者庶人也謂夫身居公卿

之位者則腰金衣紫志而盈滿氣而麤厲至如福去而禍來則有下獄投荒之患繼之如秦之李斯當秉權持軸之時專矯制而易太子適下獄臨刑之際歎牽犬逐兔不復得矣又如漢之周亞夫貴之則鑾輿親勞罪之則下獄而死及乎宋之蔡京丁謂勢在則權傾人主勢去則貶死遐方諗夫於斯危迫之際曾布褐之不如也○柳子厚詩云一身去國六千里萬死投荒十二年

蓋貴賤常相對待禍福視謙與盈鼎之覆餗以德薄而

任重解之致寇實自招於負乘

餽桑谷切

貴賤常相對待者謂貴與賤恆常相對等待更互遷改無常也如傳說由版築而至相商鞅由相而至逋夫之類故易謙彖曰鬼神害盈而福謙人道惡盈而好謙謂鬼神幽隱常降禍害於盈滿者而降福祉於未盈者此鬼神之尚謙者也人之道亦憎惡於盈滿而喜好未盈滿者○易鼎九四爻曰鼎折足覆公餗孔子繫辭釋之曰德薄而位尊知小而謀大力少而任重鮮不及矣復稱易曰鼎折足覆公餗其形渥凶

言不勝其任也公餗公侯之美食也渥赤也言力少不能任重致於折足覆敗公之餗饌則其形赧然爲凶○易解六三爻負且乘致寇至繫辭孔子曰作易者其知盜乎易曰負且乘致寇至負也者小人之事也乘也者君子之器也小人而乘君子之器盜思奪之矣註負者擔也乘者車也故泉峯龔氏曰負者小人之事謂六也乘者君子之器謂三也以六居三陰居陽位也○西漢董仲舒對武帝策曰負且乘致寇至乘車者君子之位負擔者小人之事言居君子之

位而行小人之行者其禍患必至矣

訟之鞶帶不終朝而三褫孚之翰音凶于天之蠲登靜

言思之如履薄冰噫可不忍歟

鞶薄官切褫直爾切說文奪衣也

易訟上九曰或錫之鞶帶終朝三褫之象曰以訟受服亦不足敬也鞶帶爵命之服也褫奪也訟爭競也謂訟卦上剛下險健于爭訟況以剛居上九之高極於爭訟而或獲勝得錫爵命之服終爲下所奪不能安久由訟而得故人得而奪之亦不足敬也然其所得終必失之聖人爲戒之意深矣○易中孚上九翰

音登于天貞凶象曰翰音登于天何可長也本義曰
雞曰翰音乃巽之象雞非登天之物而欲登天信非
所信而不知變亦猶是也言居位之極而不知變雖
得貞亦凶故夫子復以象斷之曰此不知止之事何
能長久而不變也漢書敘朱博傳曰位過厥任鮮終
其祿博之翰音鼓妖先作○詩小雅小旻詩云戰戰
兢兢如臨深淵如履薄冰此詩蓋周大夫作此以戒
幽王言當戰戰然恐懼兢兢然戒謹如臨至深之淵
恐其墜如履至薄之冰恐其陷此引以勸秉鈞持軸

之貴公當思戒謹恐懼之言無忘履薄臨深之戒焉

寵之忍第十四

嬰兒之病傷於飽貴人之禍傷於寵

漢末王符字節信臨淄人隱居著書號潛夫論有曰
嬰兒常病傷於飽貴人常禍傷於寵哺乳多則生癰
病富貴盛而致驕疾見本傳

龍陽君之泣魚黃頭郎之入夢

戰國策魏王與龍陽君共船而釣十餘魚而泣下王
問之對曰臣始得魚甚喜後得又益大欲棄前之所

得魚今臣得爲王拂枕席爵至人君走人於庭避人於途四海之內美人甚多聞臣得幸於王也必褻裳而趨大王臣亦猶前所得魚亦將棄矣臣安能無涕出乎註龍陽君魏王幸臣也一說幸姬○西漢鄧通擢船爲黃頭郎漢文帝夢上天有一黃頭郎推上則其衣尻後穿覺而物色得通於漸臺通衣果穿寵幸甚之賞賜巨萬相者相通當餓死賜以蜀山封上大禹夫得以自鑄錢後景帝卽位有人告通盜出徼外鑄錢竟案驗盡沒入之不留一錢寄死于人家黃頭者

黃中央土色謂土勝水故權船者著黃帽也見本傳
漸臺師古曰臺在池中爲水所浸郊祀志北治大池
漸臺徼外師古曰徼猶塞也東北謂之塞西南謂
之徼塞者以障塞爲名徼者取徼遮之義徼工鈎切
董賢令色割袖承恩珍御貢獻盡入其門堯禪未遂要
領已分

禪去聲讓也

西漢董賢字聖卿雲陽人美麗自喜柔和便辟先爲
太子舍人建平四年入爲侍中後位至大司馬哀帝
甚寵幸之出則參乘入則侍御妻通籍殿中女弟爲

昭儀父恭爲少府貴震朝廷權侔人主嘗與帝晝同
寢偏藉上袖上欲起賢未覺不欲動賢乃割袖而起
其恩愛至此上爲之起大第北闕下窮極技巧賜上
方珍寶皆選入於第元壽元年司隸鮑宣上書言董
賢本無葭莩之親但以令色諛言自進賞賜過度竭
盡府藏海內貢獻當養一君今反盡之賢家豈天意
與民意也一日上嘗置酒麒麟殿從容視賢笑曰吾
欲法堯禪舜何如時王譚子王閎進言曰天下乃高
帝天下非陛下之有也天子無戲言上默然不悅二

年帝崩賢以罪罷卽日與妻皆自殺疑其詐死發其棺至獄診視因埋獄中家屬徙合浦縣官折賣董氏財四十三萬萬見鮑宣及佞幸本傳太史敘曰彼何人斯竊此富貴營損高明作戒後世○梁蕭譽獲裴政謂曰若從我計貴及子孫如或不然要領分矣

國忠姊妹極貴絕倫少陵一詩畫圖麗人漁陽兵起血污遊魂

唐楊國忠初名釗貴妃之從祖兄也以貴妃寵幸於玄宗賜改爲國忠初爲御史大夫遷右相兼吏部尙

書娣妹皆有才色上呼之爲姨封秦韓魏三國夫人
出入宮掖並承恩澤勢傾天下與弟鉅跡五家凡有
請託府縣承迎四方賂遺惟恐落後上所賜予五家
如一競開第舍極其壯麗一室之費動經千萬故杜
少陵作麗人行云就中雲幙椒房親賜名大國貌與
秦御廚絡繹送八珍炙手可熱勢絕倫天寶十四載
安祿山反以漁陽起兵而玄宗幸蜀至馬嵬驛將士
憤怒以禍由國忠遂殺國忠及韓國夫人貴妃縊死
故白樂天作長恨歌曰娣妹兄弟皆列土可憐光彩

生門戶緩歌縵舞凝絲竹盡日君王看不足漁陽鞞
鼓動地來驚破霓裳羽衣曲又少陵哀江頭云明眸
皓齒今何在血污遊魂歸不得○東坡有云味摩詰
之詩詩中有畫今少陵之詩所言楊氏盛衰之事亦
由是也故曰少陵一詩畫圖麗人

富貴不與驕奢期而驕奢至驕奢不與死亡期而死亡
至思魏牟之諫穰侯可股慄而心悸噫可不忍歟

戰國魏公子牟遊於秦且東行穰侯送之曰先生將去
之矣獨無一言以教之乎公子牟曰微君言之幾忘